

VERDEIL DE WELVAART, NEET DE LUIJ.

**VEUR E MESTREECH BOE
EEDEREIN DEBIJ HUURT.**

VERKEZINGSPROGRAM 2026 - 2030



Maastricht



VEURWOORD

Beste Mestreechteneer,

Mestreech is 'n prachtige stad. 'N stad mèt 'n rieke historie, 'n eigezinneg karakter en 'n enorme potentie. Meh achter de pittoreske gievele en de vol terrasse sjuilt, wie veer de aafgeloupe jaore kier op kier hōbbe laote zien, 'n ander werkelekheid. De werkelekheid vaan 'ne greujende aafgroond. Tōsse deginnege, die profiteere vaan de glanzende citymarketing, en deginnege die meujte hōbbe um de heur te betaole. Tōsse e stadhoes dat investeert in prestigeprojekte en de wieke boe de basisveurzening versjraole.

De aafgeloupe jaore hōbbe veer us, mèt mer twie zetele in de gemeinteraod, mèt hand en tand verzat tege deez twiedeiling. Veer hōbbe us mèt groeten inzatz dudelek laote zien, binne de raodzaol en ouch daoboete, sjouwer aon sjouwer mèt de luij boe-um 't éch geit. Veer hōbbe laote zien totste ouch mèt 'n klein fractie 't versjèl kins make. Zoe stoonte v'r veuraon in de strijd veur éch betaalbare woeninge op Palace/Wyck in plaats vaan weer e luxe-hotel. Ouch hōbbe veer us ingezatz veur e fatsoendelek en geliekwierdeg loen veur 't personeel vaan 't Geusseltbad en stoonte neve hun wie ze 't werk neerlagte veur hun rech. En door euze lange aktieve inzatz, same mèt andere, kump noe eindelek ouch e bitsje hoop nao vāore veur 'ne stabiele towkoms veur de culturele vrijplaats, us onmisbare Rafelren. Stōk veur stōk rizzeltaote die laote zien tot verandering meugelek is este dōrfs te knōkke.

Dit programma is 't rizzeltaot vaan d'n inzatz binne en boete de raodzaol. 'T Is e plan dat neet is gesjreve in de achterkemerkens vaan 't stadhoes, meh dat is geveujd door hiel vāol gesprekke in de buurte, aon de keuketaofel en op straot. 'T Is us antwoord op de kille logica vaan de commercieel merret en de bureaucratie vaan 'n euverheid die te dēks oetgeit vaan wantrouw, wie aon 't leech kaom bij de sjemeleke "kliklijn" die veer probeerde aof te sjaffe.

De SP heet beweze tot veer mèt twie zetele vāol kinne bereike. Meh veer zien nog lang neet klaar. Us ambitie is nog vāol kiere groeter. Veer wēlle greuje en in de volgende raodsperiode mēbesture. Neet umwēlle vaan de mach of umtot 't pluche zoe lekker zit, meh umtot 't anders mōt. Umtot us sjoen Mestreech 'n fundamenteel ander, supersociaal verhaol en e minselek bestuur verdeent. E bestuur dat de kās maak veur bestaanszekerheid, veur betaalbare échte woeninge, veur gezondheidszōrg zonder 't ouch op wins, en veur 'n economie die werk veur us allemaal, en ouch veur tot de inwoeners mie te zēgke kriege.

Dat verhaol, die visie en die concrete routekaart nao 'n ierleker en socialer Mestreech, vinste in dit radicaal vernuiende programma

Veer winse ouch allemaal vāol leesplezer tow, en v'r hope in miert 2026 op eur stum te mage rekene, zoetot veer same kinne bouwe aon de sociaal stad Mestreech

Jack van Gelooven
Lijsttrekker, SP Maastricht

Stephanie Blom
Gemeenteraadslid, SP Maastricht

EUZE VIEF SPEERPUNTE VEUR MESTREECH

1. Veer goon weer bouwe veur gewoon luij

In Mestreech is woene steeds wijer verwoorde tot e verdeen-model, terwijl 't e basisrech zow mote zien. Te lang heet de gemeente de regie oet han gegeve aon projekoontwikkeleers en belèggers, mèt es gevolg torehoech prijze, lang wachlieste en buurte die weure ingeriech veur wins in plaots vaan woenbehoofte. De SP maak 'n kääs veur 'n fundamenteel ander koers. Veer stoppe d'n oetverkoup vaan euze grond en nääme es gemeente weer zelf de verantwoordelijkheid veur wat, veur wee en tege welke pries gebouwd weurd. Jummers allein es de stad zelf de regie heet, kinste bouwe veur luij in plaots vaan veur de commerciël merret.

Vaanoet die kääs bouwe v'r weer publieke hoesvesting op. Veer riechte e Gemeintelek Woenbedrief op, neet geriech op wins meh mèt ein dudeleke opdracht: betaalbare gooj woeninge realizere veur starters, gezinne, awwer luij en luij mèt e midde-inkoume, die noe klem zitte. Dit woenbedrief geit zelf bouwe, woeninge opkoupe en betaalbaar verheure, tege kospries en in samespraak mèt de wiek. Zoe hawwe v'r woeninge in Mestreechse han, zörge v'r veur liegere heure en mie invloed veur bewoeners, en bouwe v'r buurte boe luij kinne blieve woene, z'ch thoes veule en same hunnen towkoms opbouwe. Dat is bouwe veur gewoon luij.

2. Veer goon aon de geng tege d'n aofgrond tösse erm en riek.

In Mestreech bepaolt d'n postcode ummertow dèkser d'nen towkoms. Oonderwijl tot sommege buurte weure aofgesjermpt vaan betaalbare woeningbouw en dik profetere vaan investeringe, stapele z'ch de probleme op in wieke wie Potteberg, Malpertuis, Nazareth, Wittevrouweveld en Mariaberg. Dao leve relatief vää luj in ermood, dao zien woeninge slechter oonderhawwe, is de werkeloosheid hoeger en verdwijne veurzeninge die zjus dao hel nudeg zien. Dee greujenden aofgrond is gein touwval en gein natuurwèt, meh 't rizzeltaot vaan jaorelange politieke kääs. Kääs die oongeliekheid höbbe laote greuje en twiedeiling höbbe genormaliseerd. De SP weigert dat te acceptere. Veer keze veur 'n stad die neet is ingeriech veur de *happy few*, meh veur eederein dee hei woent, werk, en zie leve probeert op te bouwe.

'Nen towkoms zonder twiedeiling vraog um dudeleke kääs. Veer investere extra boe de probleme 't groetst zien, mèt 'ne stevege en structurele aonpak in kwetsbaar wieke. Tegelijk doorbreke v'r de einzijdigheid in ander buurte door óuch dao in te zette op sociaal heur en betaalbare woeninge te bouwe – in Villapark, Sint Pieter en langs de Greune Lääper. Solidariteit is jummers gein chariteit, meh twieriechtingsverkier, en 't beteikent tot eederein bijdreug aon 'n ierleke stad. Zoe bouwe v'r aon gemingde, leefbaar wieke boe luij z'ch tegekoume in plaots vaan te oontwieke. Dat is gein verkezingslogan veur 't gemaak, meh 'nen opdracht. En dat is 't Mestreech vaan de SP: 'n oonverdeilde stad, mèt gelieke kanse veur eederein.'

EUZE VIEF SPEERPUNTE VEUR MESTREECH

3. Veer redde 't Landbouwbelaang! Veer cultuur die bleujt

'N stad dreijt neet allein op deur stein, geld en prestige, meh veural op de luij die hãör kleur, ziel en eigeheid geve. Daoveur zien plekke nudeg boe neet alles veuraof is towgetummerd, boe ruimte is um te experimentere, te make en same te koume. Dat zien de rafelren vaan de stad: cultureel vrijplaotse boe creativiteit oontsteit, gemeinsjappe greuje en boe luij zichzelf kinne zien zoonder commerciële knelpunte. 'T Landbouwbelaang is zoen plek. Al decennialaank is 't 'n thoes veur makers, muzikante, kunsteneers en vrijwèllegers – 'n unieke vrijplaots die Mestreech neet ermer meh rieker maak.

Toch maak 't actueel stadsbestuur kier op kier de kãös veur 't wegpótse vaan deeze plekke. Rafelren mote verdwijne veur luxe apparteminte, stadsvilla's en prestigeprojekte die allein besjikbaar zien veur 'n klein bovelaog. Ouch 't Landbouwbelaang dreig te weure opgeofferd aon "The M", boe de goojekoupste woeninge bekans veer ton koste. Veur de SP is dit oonacceptabel. Veer hõbbe us tot 't uterste verzat tege oontruiming vaan de actueel locatie en blieve pal stoon veur de gebruikers. Noe, wie dudelek is tot behaajd vaan deeze plek 'n geloupe race is, eise veer tot de gemeente hãör verantwoordelekheid nump: zõrg veur 'n volwierdeg nuij thoes veur 't Landbouwbelaang. 'N plek die betaalbaar en veur lange tied besjikbaar blijf en boe deeze gemeinsjap kint doorgreuje, Tot deen tied is us kemissie dudelek: gein oontruiming zoonder alternatief. 'N stad zoonder vrijplaotse is jammers gein levende stad.

4. Veer make 'n ind aon de vinkskes- en vrundsjespolitiek.

De stad is vaan de luij, meh te dèks weurde beslute nog genome euver eus kõi eweg. In Mestreech weure veer es inwoeners pas debij gehaold es planne al vas stoon, es 't mieste al is towgetummerd. Participatie weurd daan e verpliech nummerke: 'nen inspraokaovend, e verslaag, e vinkske. Oonderwijl hure luij veural wat allemaol néét kint. Dat oondermijnt 't vertrouwe in de politiek en jaog betrókke inwoeners weg. Wee kier op kier zuut tot zien stum gei versjël maak, kiert z'ch aof. Dat is funes veur us democratie en veur de krach vaan de stad.

De SP maak 'n radicaal kãös veur 'n ander meneer vaan besture. Tot inwoeners mier te vertèlle krieges is gein luxe, meh e rech. Inwoeners mote vaanaof 't begin kinne mètbestumme euver wat gebãört in hun wiek, buurt en stad. Neet achteraoof meh veuraof. Daomèt zètte veer in op echte democratische instruminte: burgerberaden, referenda en bottom-up wijkplannen mèt eige budsjetten en bestummingruimte. Gein sjienparticipatie, gein achterkemerkes en geine vrundsjespolitiek, meh same planne make, same kãös aofwege en same bestumme boe de cent nao tow goon. Democratie is jammers geine bestuurleke hobby, meh democratie is vaan de luij – of 't is niks.

EUZE VIEF SPEERPUNTE VEUR MESTREECH

5. Bestaonszekerheid: weer vaste grond oonder de veuj

In Mestreech moot eederein kinne leve zonder de gansen tied stress euver d'n daag vaan mörrege. Zoonder angs veur 'n leeg ieskas, 'ne stapel rekeninge of 'ne brief dee alles oonder d'n veuj weg trek. Bestaonszekerheid is veur de SP gein guns en gein tijdeleke regeling, meh e groondrech. Daomèt make veer de kääs veur 'n gemeente die oetgeit vaan vertrouwe in plaots vaan wantrouw. Regeling boeste rech op höbs, weure otomatisch touwgekind. De inkoumesgrenze goon umhoeg, zoetot ouch werkende luij neet mie tösse wal en sjeep valle. Veer pakke energie- en heuroonzekerheid éch aktief aon, zörrege veur gratis sjaolmaoltije, en pakke stèl ermooj aon door luij aktief en mèt respek op te zeuke in de wieke. Ermooj kinste jammers neet oplosse vaanachter 'ne bureau, meh door neve en achter luij te goon stoon.

Veer bouwe aon 'n stad boe-in zekerheid de norm is en onzekerheid de oetzundering. Mèt éinvas aanspreekpunt per hoeshawwe, echte sjöldpreventie en wiek-servicepunte boeste gewoen binne kins loupe. Veer investere in kinder, steune chronisch kraanke en zörrege deveur tot geine hoof te keze tösse zörghölp, ete of wermde. Zoe lègge veer weer vaste grond oonder de veuj vaan Mestreechtenere. Neet door luij te controlere en aof te rekene, meh door same te zörrege veur 'n stad die geine liet valle. Dat is jammers wat veer verstoon oonder e éch sociaal Mestreech!

AOFSLETEND - DE KÄÖS IS AON US

Geer hōb us plan veur Mestreech geleze. E plan dat neet is gesjreve in de achterkemerkes vaan 't stadhoes, meh dat is geveuid door de gesprekke op straot. In de buurte, door inspraak-aovende, en aon de keuketaofel. Wat hei veurligk, is daan ouch mie es e programma; 't is 'n fundamenteel käös veur d'n towkoms en veur de ziel vaan eus stad.

Goon v'r door op de weeg vaan de afgelopen jaore? 'Ne weeg vaan ongeliekheid, boe e betaalbaar hoes 'n luxe is gewore en boe de commercieel merret regeert ten koste vaan us gemeinsjap? Of dörve v'r 't roer um te goeje en te keze veur 'n stad die häör inwoeners weer op de ierste plaots zèt?

De SP maak volmondeg de käös veur 't lètste. Veer make de käös veur 'n stad die zelf weer betaalbare woeninge bouwt veur häör inwoeners. Veur 'n stad die de gezondheidszörg weer trök nump in publieke han, zoetot die weer drèjt um luij in plaots vaan wins en cent. Veur 'n stad die de mach trök gief aon de wieke, umtots diech zelf 't bèste wèts wat good is veur dien buurt. 'N stad die investeert in proper loch, gelieke kanse veur eeder keend en cultuur die vaan us allemaal is.

Deez verandering kump neet vaan zelf. Ze vreug um mood um te breke mèt 't aajd beleid en te geluive tot 't anders kint. Dien stum bij de verkezinge vaan maart 2026 is daobij cruciaal. 'T is naomelek mie es e hōkske roed kleure, 't is e krachtig signaal aon de zittende mach.

Meh 't is bove alles de käös veur 'n solidaire en rechveerdege koers veur us sjoen Mestreech.



Wilt u
een Super
Sociaal
kabinet ?